

欽定大清會典事例

欽定大清會典事例卷二百九

戶部

漕運

漕運考成起運完欠

白糧考成糧船事故

倉庫盤查試科河運

漕運考成。○順治十三年題准。各省漕糧。經徵州縣衛所各官。初叅未完不及一分者免議。一分以上。罰俸六月。二分以上。住俸。三分以上。降二級。四分以上。降三級。五分以上。革職。並戴罪督催。完日開復。○又定。州縣衛所各官。叅後漕糧違限不完者。加倍議處。應罰俸者住俸。應住俸者降二級。應降二級者降四級。應降三

級者革職。戴罪督催完日開復。應革職戴罪者。實降二級調用。○十八年題准。州縣各官。初叅淮徐等六倉糧銀未完不及一分者。停其升轉。一分罰俸六月。二分罰俸一年。三分降俸一級。四分降俸二級。五分降職一級。六分降職二級。七分降職三級。八分降職四級。以上皆戴罪徵收。停其升轉。完日開復。九分十分革職。布政使知府直隸州知州。初叅各倉糧銀未完不及一分者。停其升轉。一分罰俸三月。二分罰俸六月。三分罰俸一年。四分降俸一級。五分降俸二級。

六分降職一級。七分降職二級。八分降職三級。九分降職四級。以上皆戴罪督催。停其升轉。完日開復。十分革職。巡撫初叅各倉糧銀未完不及一分者。停其升轉。完日開復。署印官初叅各倉糧銀未完不及一分者。停升。一分二分罰俸三月。三分罰俸六月。四分罰俸一年。五分降俸一級。六分降俸二級。七分降職一級。八分以上降職二級。皆戴罪督催。停其升轉。完日開復。署印官初叅各倉糧銀未完不及一分者。停升。一分二分罰俸三月。三分罰俸六月。四分罰俸一年。九分十分降一級調用。

不及一月者免議。州縣各官。參後各倉糧銀限
一年內全完。如限內不能全完。原參不及一分
者。罰俸一年。一分。二分。降三級調用。三分。四分
降四級調用。五分。六分。降五級調用。七分。八分
革職。布政使。糧道。知府。直隸州知州。參後各倉
糧銀限半年全完。如限內不能全完。皆照州縣
官例處分。巡撫。參後各倉糧銀限二年內全完。
如限內不能全完。原參不及一分者。罰俸一年。
一分。二分。降二級調用。三分。四分。降三級調用。
五分。六分。降四級調用。七分。八分。降五級調用。

九分十分革職。○康熙二年題准。現年額徵漕
項錢糧。或一官經管。或數官經管。總作十分計
算。不必各作十分。接徵接催之官。皆照經徵督
催例議處。○又題准。漕項倉項錢糧。參後各立
年限。州縣各官限一年。糧道知府均限一年半。
巡撫限二年。催追全完。不完不復作分數。皆照
原參分數處分。○又定。各省糧道。不必分別正
官署官。功罪皆一例行。○又題准。臨德江甯。淮
徐鳳陽等倉銀糧。經徵督催官。與隨漕項下錢
糧。各作十分考成。○又題准。巡撫等官催徵錢

糧。叅後年限已滿。該撫將自欠原叅分數。及糧道等官分數。不於叅本聲明。查出。照原叅分數加等治罪。○又題准。各省隨漕輕齋等項錢糧。經徽州縣衛所各官。初叅未完不及一分者。停其升轉。罰俸一年。一分降職一級。二分降職二級。三分降職三級。四分降職四級。皆戴罪徵收。五分以上革職。督催糧道。知府各官。初叅未完不及一分者。停其升轉。罰俸六月。一分罰俸一年。二分降職一級。三分降職二級。四分降職三級。五分降職四級。皆戴罪督催。六分以上。革職。

巡撫初叅未完一分二分者罰俸三月。三分罰俸六月。四分罰俸一年。五分降俸一級。六分降俸二級。七分降職一級。八分降職二級。皆戴罪督催完日開復。州縣衛所各官隨漕輕齋等項錢糧叅後年限內不能全完。原叅不及一分者降一級調用。一分降三級調用。二分降四級調用。三分降五級調用。四分以上革職。巡撫糧道知府等官叅後年限內不能全完。原叅不及一分者降一級。仍戴罪督催。其餘均依州縣例處分。署任各官未完不及一分者罰俸三月。一分。

罰俸六月。二分罰俸九月。三分罰俸一年。四分
五分降一級調用。六分七分降二級調用。八分
以上革職。不及一月免議。○又題准山東糧道
專管漕糧。自開兌開幫。以及抵通交倉。皆親身
尾押。臨德二倉改折徵銀。免其考成。○四年定
江南浙江江西三省漕糧。隨漕數多。催徵州縣
等官。本任年內全完者紀錄一次。山東河南湖
廣三省催徵漕糧。隨漕等項州縣等官。二年全
完者紀錄一次。○六年定直隸州知州。經徵本
州錢糧。叅後未完。照州縣官一年限例議處。督

催各縣錢糧。叅後未完。照道府年半限例議處。
○八年題准。向例各省巡撫經管漕糧。完欠均
照糧道例議敘。嗣後停止議敘。如有未完。
仍照糧道例處分。○十年議准。督催糧道。知府
等官。初叅未完不及一分。免議。一分以上。罰俸
三月。二分以上。罰俸六月。三分以上。住俸。四分
以上。降二級。五分以上。降三級。六分以上。革職。
皆戴罪督催。完日開復。糧道。知府等官。叅後漕
糧。違限不完。加倍議處。應罰俸三月者。罰俸六
月。應罰俸六月者。住俸。應住俸者。降二級。應降

二級者降四級。應降三級者革職。戴罪督催完日開復。應革職戴罪者實降二級調用。其署印各官未完漕糧。照雜項錢糧署印官未完例議處。一分二分罰俸三月。三分四分罰俸六月。五分六分罰俸九月。七分八分罰俸一年。九分十分降一級調用。不及一月者免議。○又定催徵錢糧大小各官。或因事故離任。按其所欠分數。應虛降虛革者。俱照離任官例罰俸一年。至革職者仍行革職。○十四年題准漕糧改折銀。與隨漕項下錢糧各作分數題參。○又題准州縣

衛所官原叅不及一分。年限內不完者。降一級留任。再限一年內催完。如又不完。照所降一級調用。○又題准。署印官初叅各倉銀糧。在任不久。其欠不及一分者。毋庸停升。○三十四年題准。凡有分數錢糧。俱將接徵接催之官已完分數扣除。照現在未完分數議處。○四十四年定蘇松常鎮四府屬賦稅繁重。州縣官經徵現年漕項錢糧。於奏銷時完至九分以上者。其接徵未完舊欠錢糧。於年限案內復叅降級調用之例。改為降級留任。再限一年催徵。如仍不完。照

所降之級調用。督催各官亦照此例議處。○又定。經催經徵官。原欠不及一分。限內不完者。降一級留任。再限一年催徵。如又不能完。降一級調用。原欠一分者。限內不完。降三級調用。如年限內能催完至八九釐者。降三級留任。再限一年催徵。如仍不全完。降三級調用。原欠二分。年限內不全完者。降四級調用。原欠三分。年限內不全完者。降五級調用。原欠四分以上。年限內不全完者。革職。○雍正五年定。各官應徵錢糧。民欠未清。該督撫題請革職留任者。勒限一年

催完。准其開復。不完。革任。按其未完分數。照收糧違限律擬罪。督催各官。照例議處。本員留於該處。與新任接徵之員。再限一年催完。如有不完。將該員照所擬治罪。接徵官照例議處。○十二年定。本年奏銷錢糧。叅後咨報全完。部議未經題覆。即於奏銷案內扣除免議。其已經題覆尚未行文者。該部據咨改繕題本開復。若部議已經覆准行文。原叅議處各官。俱令該管督撫具題開復。○乾隆五年議准。浙江省漕項奏銷本折月糧廩工永減淺貢等款。列為一冊。漕截

灰石等款列為一冊。輕齋行折等款列為一冊。其向附月廩等款冊內之本色月糧一款。改入輕齋行折冊內統算考成。○又題准道庫州縣應解應給銀米。任意遲延。或移催衛幫。不即支領。即於各本案內將道縣衛遲延職名。確查附叅。○又覆准。嗣後浙江省漕糧未完。統歸巡撫辦理。漕項錢糧。仍聽總漕奏銷考成。○七年奏准。漕白二糧未完各官。初叅二叅考成。均照隨漕輕齋等項錢糧分別議處。○二十二年議准。地丁錢糧緩徵。漕項一體邀緩。若屆奏銷之期。

所有漕項未完銀兩。於奏銷冊內聲註。另歸年限扣算。補報考成。○三十二年議准。浙江省漕項錢糧。係地漕。統徵。同時分解。令各州縣將徵有地漕若干。於起解藩司糧道文內。一併報明銀數。司道衙門。均得互相查考。○四十八年議准。江西湖北二省。應徵津貼餘租。經徵各官。並不實力催徵。照正項錢糧。經徵不力。分數。分別議處。其各該藩司。照正項錢糧。按年催解糧道。濟運。並將經徵已未完各州縣。造冊送查。○四十九年議准。江蘇省長淮三四兩幫運田。坐落

壽州鳳臺霍邱三州縣境內。每年應徵津貼銀兩。歸於州縣編徵。如有拖欠。照正項錢糧分數議處。○五十一年議准。江蘇省清河等九州縣民折官辦漕糧。借領司道庫銀兩。定限於次年二月以前徵完。分解歸款。如逾限未解。將經徵接徵未完各職名。覈明分數。隨同地丁正項錢糧。於奏銷時另造一冊。開奏議處。○五十二年奏准。江興二衛快丁應繳運費。經徵各州縣向無考成。嗣後照江西湖廣等省餘租津貼之例。責成該管州縣實力催徵。如有未完。將經徵州

縣。按照未完分數開參。其未完銀兩。不得墊解滋弊。○五十三年奏准。各省耗羨已未了解數目。隨同正項錢糧統計分數。一疏具題。以定考成。如正耗全完。方准議敘。正耗欠數相符。合計分數議處。其參後仍未完解者。歸於正項年限。案內報參。僅有正耗完欠。報解不符。嚴參查辦。○五十四年定。江南省上元等州縣。應徵快丁節年舊欠。江興二衛。貼費銀兩。各屬未完銀數。在一千五百兩以上者。分限二年。五百兩至一千兩以上者。分限一年半。五百兩以下者。分限

一年完繳。如首限期滿。未經完足。即照首限銀數。以十分計算報叅。所欠首限銀兩。加入二限銀內。一併催追。儻二限期滿。再有未完。即將二限應徵。同首限未完銀兩。共作十分計考。其止分一年帶徵者。限滿無完。亦照十分計考。完不足數。即按未完分數計叅。如有叅後續完。詳請開復。均以分限銀數覈計。不分年款。○五十六年定。江蘇省嘉定寶山二縣。民折官辦漕白等米。借動道庫銀兩。定限次年二月以前分解還款。如逾限不解。將經徵接徵各官。覈明已未完

分數由道造具考成清冊。隨同漕項奏銷送部。
○嘉慶三年議准。浙江省餘杭縣徵解杭嚴衛屯田折租錢文。每年於蠶畢後趕徵三分。秋收後再徵五分。其餘二分。至次年三月徵完。移衛散給。如有未完。照未完地丁分數列揭開參。○八年議准。浙江省每年額徵漕截銀兩。照地丁錢糧奏銷之例。扣限一年。覈明分數。於次年春開造冊揭題。如屆復參限滿。再有未完。亦照該省地丁奏銷二叅之限辦理。至漕截項下應徵耗羨銀兩。隨同正銀報解。合計考成。將已未完

解各數。造入漕項奏銷題報。○又議准湖北省漕糧項下耗米撥供兵食。即與南糧無異。應統歸南糧奏銷案內造報。正耗合計考成。如有未完。照例開參。○十七年覆准。浙江省溫台衢嚴四衛所。徵解津租銀兩。經徵之員未完四分以上。罰俸六月。參後續報全完。其原參職名。業經罰俸議結者。止將議罰俸銀完繳銷案。毋庸具題開復。○道光十六年議准。江安糧道所屬應徵緩漕。並歷年帶徵漕項銀米。均覈明完欠分數。造報年限考成題參。其江蘇糧道所屬未完

緩漕米石。並巡撫督催未完。統令查明完欠分數。造報年限考成。一律題叅。○同治五年奏准湖南省二耗米折銀款。與正耗銀兩一律計考。○十三年覆准湖南省未完二耗銀兩。歷年既久。經徵接徵礙難分析。從寬免議。自同治十一年奏銷為始。將二耗一款歸併正耗銀兩覈計分數。一疏揭叅。○光緒十二年議准。嗣後糧道開報職名。凡例限隔年三月奏銷之漕項等款。應於二月內詳到。其例限次年十月奏銷之安徵增津一款。應於九月內詳到。如各州縣衛承

辦遲延。即令糧道將職名附詳。以嚴考覈。

白糧考成。○順治十一年題准。白糧與由牘銀。總屬正項。其完欠分數。應以銀米總計合算。如有未完。照例議處。○康熙六年題准。經徵督催。白糧各官完欠考成。照題定漕糧考成例議處。其交兌過淮抵通限期。以及議敘議處條例。皆照漕糧例。○十七年題准。白糧改折經費銀。原係白糧項下應徵之款。與白糧一例考成。○三十三年題准。白糧項下減存經費銀。乃解部之項。如不豫行詳請。擅自動用。將擅動之官題參。

著令賠完。○乾隆二十九年議准。浙江省白糧項下各款錢糧。照上下兩江徵解之例。於十月內完解六分。如徵解不足六分之數。罰俸六月。再限三箇月。如仍不足六分。罰俸一年。

倉庫盤查。○康熙六年題准。漕項錢糧。乃輓運急需。司府州縣等官。如將徵完之銀。挪動給發別項支用者。糧道詳報總漕題參。○二十八年題准。各省糧道存儲錢糧。於年終及離任之日。責成藩司親身盤查出結。如有虧空。立即揭報該撫題參。○雍正四年議准。道庫實在錢糧。自

雍正五年為始。照司庫例。每年春秋二季造冊報部。聽候撥解京餉。○又題准。江安。蘇松。江西。湖南。湖北。山東等省糧道衙門。各增庫大使一人。凡倉庫收放錢糧。責成稽查。其浙省道庫。即令布政使司理問兼管。○六年題准。江甯布政使司衙門。徵收上下兩江。應解南屯米麥豆。舊有倉廩。皆係吏役經手支放。今增設倉大使一人。管理。以專責成。○十年題准。德州原設常豐。德州。二倉。臨清州原設臨清。廣濟。常盈。三倉。年久坍塌。應於臨清。德州。各增建新廩六座。責成。

糧道督率臨德二州加謹蓋藏。年終盤驗。出具
實存印結送部。並令常豐臨清二倉大使巡查
看守。○十一年奏准。各省道庫一應收支錢糧。
隨時知會藩司備案。奏銷時將支銷存積各款。
造冊移司盤查出結送部。○又題准。各省糧道
新舊交代任內收支錢糧。均照布政使司交盤
例。該管督撫造冊具題。○乾隆二十年議准。漕
項實存銀兩。春秋二季撥冊。儻因地丁展限。漕
項有礙造報之處。即於展限咨內聲明。一體展
限。豫行報部。若不聲明。逾限不到者。照例叅處。

○又議准。漕項實存銀兩。春秋二季撥冊。江安蘇松湖北山東河南五省。俱係詳送各該撫咨部派撥。惟湖南浙江江西三省。各撫與漕督並行咨部。事屬重複。嗣後照江蘇等省之例。造報各該撫咨部。仍造送總漕備查。以歸畫一。○二十四年題准。臨清倉庫大使裁汰。倉務交與臨清州兼管。給丁本色米石。仍照舊赴倉支給。折色銀兩。各州縣徵解糧道支放。○二十七年議准。各省糧驛道庫。遇有新舊交代。照年終奏銷之例。令各督撫親往盤查。所有收支數目。仍令

藩司於未經盤查之先。出結詳送督撫。備結報
之後。查有侵虧等弊。督撫題參。照例分賠議處。
○又議准。湖北。湖南二省。道庫漕項錢糧奏銷。
嗣後令總督就近盤查。咨會漕督具題。○二十
八年議准。督撫接任。應行盤查藩庫之時。糧驛
二道。如係駐紮同城者。一體親往盤查。將有無
挪移虧缺之處。一併附摺具奏。○五十八年定。
有漕各省春秋撥冊。收儲銀兩。逐一登造。將年
分縣分。詳細聲明。以憑稽覈。

起運完欠。○順治五年題准。漕欠無論多寡。均

發各糧道嚴追。○九年奏准。挂欠漕糧弁兵。發南追比。承追各官。嚴查本弁本軍產業。估計變賣。儘數完糧。不得聽其株連攀害。○十二年題准。挂欠弁軍。先在通州追比。勒限一年。如不能完。倉場題明發南追比。再限一年追完。○又題准。官欠追官。軍欠追軍。每年發准追比之時。分別欠數。研審明確。官軍一例嚴追。變產完賠。如運軍侵糧脫逃。報明戶部。行總督衙門提究追擬。○十四年題准。運官到通糧米全完。緣事註誤。非貪贓失守大計。隱匿逃人。重罪。該部酌量

分別以示鼓勵。○十七年題准。總漕以通漕論糧道。以本省論。凡欠二分者。罰俸一年。再運又欠一分者。降一級調用。欠二分者。降二級調用。欠三分者。革職。○又題准。運官領運漕糧。交納銷算買補。以及隨幫帶運全完者。不准議敘。○康熙元年題准。搭解舊欠漕糧。復有挂欠倉場開列分數題參。照例處分。挂欠之米。仍照數追賠。○二年題准。總漕巡撫糧道。如通漕及本省衛所漕糧。盡行開兌。開幫北上。運務一官經手者。前官雖有事故離任。功罪應歸前官。後官免

議其總漕有一二省巡撫糧道有一二衛所未
經兌完開幫前官事故後官接管功罪應歸後
官前官免議○八年題准糧船阻凍天津漕糧
收受進倉非本年內全完至隔年始行運竣者
糧道押運等官不准議敘○十年題准漕糧開
兌過淮違限者其到通糧米雖已全完糧道等
官不准議敘○二十五年題准搭運欠舊米與
原欠米色不符者糧道知府罰俸一年領運千
總革職○四十三年議准運官挂欠糧米以通
幫糧米計算如挂欠不及一分者責二十革職

追比。追完。還職免罪。不完杖一百。革職。一分責。三十。革職。追比。追完。免罪。不完杖一百。徒一年。二分責。四十。革職。追比。追完。免罪。不完杖一百。徒三年。三分責。六十。革職。追比。追完。免罪。不完發附近衛所充軍。四分責。八十。革職。追比。追完。杖一百。不完。發邊遠衛所充軍。五分責。一百。革職。追比。追完。徒一年。不完者絞。六分以上者斬。照例籍沒家產抵償。○又議准。運軍掛欠漕糧。以一船糧米計算。如挂欠不及一分者。責二十。革運。追比。追完。免罪。不完杖一百。一分責三十。

革運追比。追完免罪。不完杖一百。徒一年。二分責四十。革運追比。追完免罪。不完杖一百。徒三年。三分責六十。革運追比。追完免罪。不完發附近衛所充軍。四分責八十。革運追比。追完杖一百。不完發邊遠衛所充軍。五分責一百。革運追比。追完徒一年。不完者。絞。六分以上者。斬。照例籍沒家產。妻子抵償。○四十九年題准。漕糧挂欠。皆由糧道監兌押運等官不親詣水次面同兌足。糧船抵淮。總漕亦不嚴行盤查。以致弁軍任意折銀。沿途盜賣。嗣後將挂欠不及一分至

六分之弁軍。照例分別治罪。其總漕糧道等官。照例按所欠分數議處。並將所欠漕糧。算作十分分賠。總漕半分。糧道一分。監兌官半分。總押運官半分。運官一分半。僉丁衛所官半分。運軍五分半。按此分數。令總漕等官於限內賠完。不完。總漕糧道各官。交部議處。運官運軍。照例治罪。仍將弁軍不能賠完之米。著落總漕糧道等官賠償。至挂欠糧米。既令總漕糧道分賠。全完者。應加倍議敘。山東。河南。湖廣。三省糧道。改為加升一級。江南。江北。江西。浙江。三省糧道。改為

加升二級。總漕議敘之例。於康熙八年停止。嗣後各省漕糧十分全完者。仍將總漕照例加升二級。○又議准。弁軍挂欠漕糧。承追督催等官。皆照經徵督催淮徐等倉糧銀例議處。○五十年題准。同幫運官。連名互結。如將赤貧之軍出結僉運。以致挂欠不能賠補。將本軍應賠五分半之內。令互結各軍攤賠一分。○又題准。嗣後一幫挂欠。府廳等官罰俸一年。糧道罰俸半年。數幫挂欠。照此遞加罰俸。○又題准。押運同知通判。一次挂欠。降一級留任。二次降二級留

任。三次降三級調用。○又題准。押運同知通判。一次無欠。加一級。二次無欠。加二級。三次無欠。不論俸滿即升。○又題准。江浙積欠之幫。一運全完。其次挂欠之幫。三運全完。餘幫五運全完。均准其即升。○五十四年題准。弁軍挂欠。嗣後免其留通。追比一年。令倉場侍郎將欠糧運軍。擎交運官。即行發南追賠。挂欠之米。限次年搭運赴通交納。如次年不搭運。總漕照例題參。○六十年題准。欠糧運官。有於倉場未題之先。已升任他職者。革職發追。俟完糧開復之日。照例

補用。○雍正元年題准。領運千總一運全完。加銜一等。二運全完。加升二等。三運全完。毫無事故者。從優議敘。即升。其江浙積欠之幫。仍照舊例。二運全完。准其即升。○二年議准。搭解舊欠漕米。必以本色交兌。搭運過淮之時。總漕盤驗足數。方許開行北上。如有麥豆雜糧等項。抵充漕欠。或過淮之後。用小船趕送者。總漕查明題參。○三年題准。欠糧運官。倉場即咨兵部開缺。俟限內全完。題請開復。別行補用。○五年題准。弁軍挂欠漕糧。向照失風挂欠之例。止收平米。

免其曠颺折耗。嗣後非失風而挂欠者。照起運之數搭運抵通。○十三年奏准。運弁領運漕白船糧。如有過淮違限。而抵通全完者。俟總漕將原叅過淮違限題准開復之後。始准議敘加銜。○乾隆二年奏准。領運守千。江浙等遠省。一二運准按運加銜。三運全完。議敘即升。不得復請加銜。至三運以後。再能全完。仍准按運加銜。山東河南二省官弁。一三五運全完。均紀錄二次。二四運全完。均加銜一等。至六運全完。方議敘。即升。亦不得重複加銜。至六運以後。均照前相

閒紀錄加銜。○又奏准重運效力武舉領運江浙等遠省。每運全完補官日紀錄二次。領運山東河南近省。每運全完補官日紀錄一次。三運運滿咨部註冊推用。○三年奏准各省糧船抵通起卸漕米。如有不足例買別幫餘米抵補。但各省收兌如果足數。抵通何至不敷。嗣後如有不足。即參處著賠。不准買補別幫餘米。其各船運軍日用餘米。坐糧廳給予驗票。准其售賣。其餘各色漕米粟米。一概不許買賣。交通水道通州知州實力稽察。如有不遵。即行拏究。儻稽察

不力。被倉場及御史訪聞。將該道該州題參議處。○四年題准。山東河南二省。遞年輪運薊糧。後停督運通判押運全完。照例議敘。○五年題准。輪運薊糧千總。照山東河南近省運通全完例議敘。○八年題准。嗣後漕運各官。因公誣誤。應降調者。如本運議敘。准其抵銷。其前運應加之銜。概不准抵。○十八年議准。武職加銜。既經刪除。嗣後領運官議敘。遠省者。一運全完。加一級。二運全完。加二級。三運全完。即升。近省。一運全完。紀錄一次。二運全完。加一級。三運。五運。與

初運同。四運與二運同。六運全完。即升所加之
級。准其隨帶。○二十三年奏准。糧船抵通。兌米。
該運丁如無故挂欠。坐糧廳勒限追完。仍行捆
打。其領運千總。及總運同知通判督運糧道等
官。所管幫內一丁挂欠。即限內全完。亦不准議
敘。令倉場將各省到通漕糧挂欠丁名幫分。年
底彙冊查考。○五十五年定。旗丁欠交。失風米
麥豆石。不即責丁交納。遲至幫船南下。始請下
年採買搭運。領運千總咨部斥革。委署千總。照
採買遲延例。罰俸一年。○嘉慶五年定。失風挂

欠米石。並不完交。官弁旗下。徑自離通潛回。除
欠交米石。咨南買補好米附搭運通外。將押運
同知領運千總。交部分別議處。○道光二年定。
押運官三次運通。全完無欠。例得送部引

見。如查有買補米石。未經運完。即將所得議敘註銷。
並將詳請給咨之坐糧廳。給咨送部之倉場侍
郎。分別交部議處。

糧船事故。○順治十五年定。漕糧改解兵米。大
江漂流。准照漂沒糧數開銷。○又題准。糧船在
江洋黃河漂流者。地方官查明給有印照。總漕

及各該撫覆勘明確。據實具題。即予豁免。如無
題報。於本軍名下追賠。若本軍無力補完。將本
幫餘米。蠶羨扣抵。務足原數。○康熙二十一年
題准。大江。黃河。漂沒搶救者。將搶獲米。灑帶各
船運送。其漂沒米。即予豁免。若坐視不救。該督
題參。從重治罪。○又題准。漂流船糧。令沿途催
趨各官及汛地文武官親臨確勘。各出保結。取
具運官結狀。該督撫具題豁免。如未經漂沒船
糧。運糧官軍詐報漂沒。並故將船放失。及雖漂
沒損失不多。乘機侵盜至六百石者。照律擬斬。

不及六百石者。照律發邊衛永遠充軍。漕米照數賠補。其沿途催趲各官。及汎地文武各官。不親臨確勘。遽出保結者。並行革職。該督撫不嚴查確實。遽行題豁。將具題督撫降二級調用。○又題准。文武官凡遇漕船沈溺。不將情由申報者。降一級調用。○又題准。押運官弁巡查不謹。以致失火燒毀漕船者。降一級調用。地方官不行協救。延燒別船者。罰俸一年。○三十六年題准。漕船失風沈溺。船未抵通。而糧已搭運到通。全完者。坐糧廳呈報戶部。運軍領過行月錢糧。

免其追繳。○四十二年奏

旨。洪澤湖水勢更甚於大江黃河之水。其失風漂沒船糧。從寬豁免。嗣後洪澤湖有漂沒船糧。亦照大江黃河漂沒之例議奏。○雍正元年題准。漕船在內河失風。將押運官弁。照失於防範例。罰俸一年。仍取具押運官弁並地方文武官弁。並無假捏印結送部。儻有假捏情弊。即將弁軍嚴加治罪。出結官弁從重議處。○又題准。糧船在內河漂流者。不准豁免。將該幫進倉米免其曬颺。以所贖曬颺折耗餘米。抵補漂流之數。如抵補不敷。將該

幫羨餘銀扣抵。該幫不足。將該衛羨銀覈總扣除。務足原額。○四年議准。失風漂流之米。除將本幫餘米抵補外。下賸米。限次年搭運抵通。正兌改兌。均照平米收受。仍免其曬颺折耗之米。以示軫恤。○又題准。漕船在江洋黃河洪澤湖。漂沒片板粒米無存者。即予豁免。○六年題准。領運弁軍。凡遇海洋大江黃河危險地方。遭風漂沒。幸獲生全者。照軍功保守在事有功之例。官加一級。運軍照軍功一等傷例。賞給。其漂沒身故者。官不論銜級大小。照軍功陣亡例。皆以

現在職任。分別准廕加贈。給予祭葬銀。運軍亦照軍功陣亡例。給予祭葬銀。其無妻子親屬者。照例給銀。該督撫提鎮委官致祭。至船內頭舵水手被淹身故者。照軍功二等傷例賞給。○十年定糧船在大江等處漂沒。旗丁淹斃。賞卹銀兩。無親屬可領者。令地方官尋覓屍骨。料理埋葬。無從覓獲者。即於淹斃處所。量予祭奠。○十二年議准。海洋大江黃河及洞庭洪澤等湖。領運弁軍被溺身故。照軍功例賞卹。其在內洋內河及停泊海口島嶼等處。修造漕船遭風

漂沒幸獲生全者。照軍功例減等。官給予紀錄。二次。運軍人等。照二等傷例減半賞給。其漂沒身故者。亦各減一等。分別廕贈給祭葬銀。無妻子親屬收受者。仍照例給銀二兩。委官致祭。再內洋等處遭風溺故之千總。量減一等。廕子弟一人。以把總補用。○十三年定。漕船經運五六年。及未至五六年。而有風火等事之失。責令賠造。經運七八年。而有事故。責令買補。經運九年。而有事故。以及腐朽不堪者。責令雇募。均至十年限滿。准其給價配造。○乾隆三年題准。漕糧

內河失風漂流。運軍賠累艱難。應交茶果銀。概行免交。其糧已漂失。臨倉買補。無藉經紀車戶轉運者。箇兒錢一併免交。若船無破損。米無虧缺。到通轉運進倉者。箇兒錢照舊交納。○又題准。失風之船。能岸救修。船抵通。糧無虧折。或買補全完者。領押守千丞倅。皆免議處。仍照例議敘。儻船非滿號。不能岸救。米有挂欠。雖買補全完。亦仍照例議處。至地方文武官弁協同岸救。船糧均無虧者。免其議處。○又題准。押運丞倅。遇有幫船失風事故。向例與領運守千一例議

處。但丞倅統轄十餘幫。較之守千專管一幫者。有間。嗣後量為輕減。原例罰俸三月者。改為一月。罰俸六月者。改為三月。罰俸一年者。改為六月。降一級留任者。改為罰俸一年。降一級調用者。改為降一級留任。降二級調用者。改為降一級調用。革職者。改為降三級調用。○四年題准。糧船停泊處所。他船失火。該軍在船。不即設法開放。地方官不行星飛撲救。以至延燒者。將火毀之船。責令官軍名下分賠。造運。○五年題准。漕船遇有事故。各失防職名。照例開送。如有應

行免議之處。於咨內聲明。聽吏兵二部察覈。○
又題准。副軍有在大江。黃河。被淹身故者。照軍
功二等傷例賞給。○又奏准。漕船遇有風火事
故。押運官弁。即速報明沿河地方各官。協同救
護。並將各情由申明各上司。聽漕運總督查明
報部。○又定。各省漕船遇有事故。例應賠造者。
回次之時。即行遵例賠造。儻有藉詞減歇。遲至
次年興造者。將督催衛員照例題參。○六年題
准。各省出運船糧。凡有失風漂流之米。照例報
部分別易換扣抵。儻有徇隱捏報等弊。照例題

參。○七年議准。糧船失風火燎。其船不致被沈者。無論已未過淮。即令修固原船。復載抵通。如已被沈難岸者。即雇民船載運。隨幫過淮。盤驗抵通。儻過淮時未經雇募。將來已分通幫帶運者。不許中途再雇民船裝運。以杜盜賣攙和之端。若過淮後失事。或在黃河中流。及該地方無民船雇募者。仍令先分通幫帶運開行。一面前途雇覓民船裝運。總著通幫衆丁。出具互報各結。抵通交納。稍有虧欠。責令賠補。○九年議准。留通變賣船隻。沿途遇有失風事故。旋已修脩

堅固。將米灑帶通幫運通。其船即在途次變賣者。將千總查叅。罰俸九月。○十二年定。漕船減歇在塢。被行船撞損。該管千總隱匿不報者。照失風漂沒不行申報例。降一級調用。○又定。漕船在大江、黃河等處遭風漂沒。如有撈救乾溼米石者。其虧折之糧。例不豁免。若虧折過多。數在八九百石以上。一時買補。丁力艱難。總漕據實具奏。即將買補銀兩解通。於下年本倉餘米內買補報部。其漂沒船隻。仍照例辦理。○十四年議准。漕船回次。雖交與地方官收管。仍著隨

幫官弁約束稽查。遇有風火事故。即將該隨幫
職名報叅。如新運千總。既經接收幫船。即將新
運千總職名報叅。或漕船減存在次。遇有事故。
隨幫二弁均不能兼顧。即開收管之地方官職
名報叅。至押運同知等官。如遇回空到次。後風
火事故。免其叅處。○又議准。江廣漕船失風沈
溺。如果不堪岸修。無論已未滿號。地方官驗明
拆板堆存出結。仍報總漕衙門。所拆板片。就近
變價。地方官將所賣價銀。鈐印封固。交運弁帶
回。呈明糧道驗封給發。至回空漕艘。遇有失事。

亦照此例辦理。○二十一年定漕船如在大江
黃河漂沒例應題豁者該督撫一面具題請豁
一面責丁成造毋任遲延致誤下運。○二十四
年議准各幫旗丁以船為家至遭沈溺其沈失
米石既責之本丁賠補而沈溺漕船如運至五
六年者又例應本丁賠造是該丁業已傾家而
賠米賠船總責之數月之內甚屬拮据嗣後凡
旗丁應賠之船本年新漕暫准其雇募一次俟
次年賠造兌運。○二十五年議准黃河兩岸捕
魚小船令清河縣開具姓名造冊編號責令管

河縣丞。河標把總。經管約束。遇有糧船失風。即令各駕小船先行救米。護行救貨。米聽押運之員分散本幫各船。貨物聽該管縣丞把總查明交還。失風之運軍酌量出給飯錢。儻有小船乘機搶掠。或被旗丁呈首。或經催漕之員稟報。即將該縣丞把總查叅。照約束不嚴例降一級調用。其搶貨各犯俱照白日搶奪例問擬。○二十七年定。漕船如遇民船失火延燒。丁民各半分賠。○又定。失風船隻如係自備民船。原裝米石顆粒無虧。失防職名免其開報。○二十九年議

准江蘇浙江山東河南等省買補船隻如已滿
號遇有失風事故即就近拆變飭地方官將變
價銀兩封交員弁攜帶回次呈繳糧道驗給各
軍以補新造○三十年定受兌漕船如被木簰
碰壞其沈溺米石令木商照數賠補損壞船隻
修脩齊全○三十一年

諭漕船遭風失火延及鄰艘究係防範不慎應令其照
數買補分兩年完倉至因別舟火起倉猝延燒並非
疏於防護所致著免其賠補○三十二年

諭漕船偶遇冰凌迅下船身碰破人力難施非該丁等

防護不慎所致。所有沈失米石。著免其賠補。○三十四年定。九運漕船回空。於黃河漂沒。業經派減一載者。准其給料成造。○三十五年

諭

漕船焚失糧石。自應按數著賠。若船糧猝遇雷火焚毀。非人力所能豫防。所有應賠糧石。漕船俱加恩寬免。其總押領運員弁。亦非救護不力。一併免其查議。○又定。漕船內河失風。押運官罰俸六月。能岸救船隻。修艙抵通。糧無虧折。並買補全完。均免議處。船非十運不能岸救。米有挂欠。雖買補全完。仍照例議處。○又定。漕船內河失風。捏報大

江黃河領運地方各官。各降一級調用。若遭風水不順。地方官與押領員弁。共同申報守候日時。儻不顧風色水勢。催趲前進。致有疏虞。地方官罰俸一年。押運官罰俸六月。如有捏稱風水不順。逗遛脫幫。總漕並督撫查叅。將不實力催趲之地方官。降三級調用。押運官降一級調用。若汎水漲發。失風漕船。地方官能協同岸救。修船抵通。糧無虧折。免其議處。不能協同岸救。以致漂沒。仍照例議處。如雇募民船。遇有風火事故。聽其換船裝運。米無虧折。失防領運地方各

官免其議處。○三十九年定。六七運漕船回空。於洪澤湖漂沒者。雖經派減一次。係屬七八運。仍令買補足運。○又定。漕船上年牘河漂沒下年一半。應行搭運米石。准其買餘抵補。免其搭運。○四十一年奉

旨。宿州二幫漕船。行至清河縣極險湖心。陡遇暴風。船經漂沒。淹斃多人。自屬人力難施。沈溺米石。加恩豁免。○又定。漕船在次失風。該管衛守備不行詳報。照承辦錯誤例。降一級留任。○又定。白糧幫剝載米石。被空船碰翻。押運官失於防範。仍照例議

處領運千總。照防範不嚴例。降一級留任。其行船碰住船之領押職名。查叅送部。○四十二年奉

旨 湖北三幫漕船。在內河失事。例固應賠。但念幫船猝遇暴風漂溺。人力難施。情尚可原。加恩令其各買本幫餘米三百石。其餘米石同隨糧席竹。緩俟下年搭運全完。○又奉

旨 宿州二幫漕船。在洪澤湖漂沒。賞借銀兩。原定分作五年歸款。丁力未免拮据。著再於原定五年之限。加展三年。以示體恤。○又定。漕船住泊失火被焚。並延

燒尾接之船。其應賠船隻。准其暫行雇募一次。至應雇船隻。與賠造新船。責令弁丁各半分賠。其銀兩令衛守備催追。勒限賠造。○又定。回空漕船。遭風覆溺。押領員弁不行呈報。降一級調用。○又定。漕船除在大江黃河洪澤等處。及牖河內失風。查無情弊者。仍照向例辦理外。其在內河失風。或止一二隻。及船米無虧者。均照例議處。三隻以上。運弁降一級調用。押運廳罰俸一年。五隻以上。運弁革職。押運廳降一級留任。旗下杖一百。枷號一月。如有捏報失風。從重議

處。儻盛夏之時。在內河遇雨。被水衝壞數隻。由

該督及巡漕御史

後裁

查明實在情形。奏明分別

辦理。○四十五年定。漕船被火燒毀。被燒米石。

於各丁餘米內。分作兩年抵補。○四十七年議

准。買補船隻。如歷九運。遇有事故。即照軍前之

例。雇募寬大民船一次。以足十運。○四十八年

定。漂沒船糧業經豁免。其隨船席竹一體豁免。

撈獲溼米。以食米易換。如有不敷。准由臨倉買

餘抵補。○又定。滿號雇募船隻。及起剝民船。在

內河失風沈溺。如所載糧米有虧。即應計隻扣

算。若船米無虧。及回空船隻本無糧米。無弊可
作者。均毋庸計算隻數。至牯河失風。果在險要
處所。免其計算。○四十九年定。重運漕船。在黃
河中心漂沒。辦理遲延。違限一年以上之地方
官。降一級留任。○五十二年定。減歇船隻。於上
年沈溺之後。不卽及時賠造。藉稱江水漸漲。勢
難拆板。遽請雇募。將辦理錯誤職名。送部議處。
○又定。客船內失火。延燒空重漕船。及官剝船
隻。燒毀船隻米石。押令照數賠交。失火之雇工。
嚴拏治罪。○五十五年定。回空失風船隻。文內

不將險要處所聲明。其隨幫武舉。照遺漏聲敘
例。罰俸六月。○又定。失風漕船。該幫千總。匿不
具報。率請改造。將該幫千總。照隱匿不報例。降
二級留任。衛備罰俸一年。地方守備。照漕船失
風例。罰俸一年。○又定。幫船因雇募窄小。將帶
運麥豆。另雇剝船裝運。以致遭風沈溺。衛備。照
失於查察例。罰俸一年。○五十六年定。漕船已
歷七八運。該道衛並不隨時詳報加修。率將應
運漕糧。於各船灑帶之外。仍令原船減載。跟幫
以致被冰撞沈。糧道衛備。照失於查察例。罰俸

一年。○五十七年奏准。漕船在牘河內河失風。及冰凌擦損沈溺。領運之舟。每隻罰俸一年。至一運內失防漕船。先後接算。在三隻以上者。運舟降一級調用。五隻以上者。革職。既經併案議處。所有一運內逐案罰俸之案。應予查銷。○嘉慶六年定。漕船因風火燃。領運千總。照例降一級調用。銷去任內尋常加一級。抵免降調。○七年定。一運漕船回空失風。因賠造不及。又無合式船隻雇募。該丁應兌之米。准其將因災派減幫船。赴次受兌。仍歸該幫行走。其船仍令賠造。

派入減存。下年接運。○八年定失風折板漕船已歷五運。例應賠造。因丁力艱難。派入輪減。俟下年賠造接運。○又定回空漕船因風失火。押運通判降一級留任。地方文職照例罰俸一年。○十一年奏准失風事故船隻滿號之年。照並無事故軍船之例。一體免其雇募補運。○道光八年議准。嗣後漕船遭風。除天津關以南。仍由漕運總督照例覈辦外。天津關以北。無論軍制船隻。如有失風事故。概令報明地方官查實結報。一面將溼米帶壩呈驗。方准買餘抵補。如旗

丁捏報。或地方官扶同徇隱。一併查叅。若僅據營汛運弁呈報。並無正印官加結。亦未呈驗漕米者。仍照挂欠之例辦理。並勒限購米運交。儻有不完。照例治罪。○又定。各省幫船。在大江大湖黃河。遭風漂沒。如係應行豁免者。該督撫照案先行奏明。一面確勘會題請豁。○咸豐七年定。江安。江蘇。浙江。江西。湖北。湖南等省漕船。停泊在各州縣地方境內。嚴飭各該州縣。協同該幫官弁認真稽查。毋許該丁攬載漁利。私行盜賣。捏報風火損壞。希圖改造。遇有滿號及風火

事故由地方官及該幫看減千總會勘明確。出具切結。移送該管守備加結。詳由糧道覈明。轉詳報部。○又定。各省漕船停泊在各州縣地方官境內。如有官丁私行拆變。捏報損壞。希圖改造。地方官不親詣勘驗的實。扶同蒙混。遽為加結呈報者。革職。如無蒙混。不即會勘。經該管上司查參。或別經發覺。船數在一隻以上。降一級調用。五隻以上。降二級調用。十隻以上。降三級調用。若勘驗明確。僅止失於查察。罰俸一年。如正犯丁役潛逃。限百日拿獲。逾限。降一級留任。

再限一年緝獲。准其開復。限滿無獲。照所降之
級調用。○又定。旗丁私行拆變漕船。捏報損壞。
該幫看減千總。並不申報勘驗。扶同蒙混。均革
職。其並非扶同蒙混。而因循怠玩。不即申報勘
驗。數在一隻以上。降一級調用。五隻以上。降二
級調用。十隻以上。降三級調用。若勘驗明確。僅
止失於查察。每隻罰俸一年。船隻照失火燒毀
例著落弁丁賠補。

試辦河運。○咸豐八年

諭。彭蘊章等奏會議海口米石分成仍歸河運。請飭有

漕各督撫籌畫試行一摺。海運漕糧本屬一時權宜之計。現在瓜鎮克復。江路已通。運河設法挑濬。人力可施。黃河一帶。商船停泊不少。自應將糧石酌分成數。河海並運。以圖經久之規。著何桂清。庚長。李鈞。邵燦。趙德。轍。晏端。書。崇。恩。按照所奏。各就地方情形。通盤籌畫。本屆如何試行。即於海運漕糧內分定成數。改歸河運。儻因趕辦不及。須俟來年。亦應豫為籌定。惟所稱以三成試歸河運。以七成仍由海運。河運米數。未免太少。能酌加成數。更為妥善。○同治三年

諭

吳棠奏東南軍務大定。擬試辦河運等語。據稱江北

各屬均以河運為便。惟停運有年。漕艘久廢。若設法雇用民船。慮難鈐束。並沿河一路。緯隄插壩。浮送能否無虞。亦難逆料。現擬於清淮軍需捐款內。動銀購米三萬石。解赴通倉。試行河運。著照所請。即行採買米石。雇備民船。由河道運送通倉。所有轉運事宜。並江省應行經過河道。均著飭令該地方官妥速經理。一俟議定章程。即行具奏。並著鄭敦謹將糧艘經過河路之緯隄插壩。有無應行修整挑濬。即飭沿途管河官弁一體迅籌備辦。用利運行。如能執行無滯。來歲江北新漕。即由吳棠等仿照辦理。以復河運成規。

○四年奏准江北一帶出產秔米無多。應紅白兼收。秔秈並運。○又奏准民船耗米。按漕斛每石給予一升。員役船戶食米。另行寬為備帶。其倉耗二升。照案隨正交倉。○又奏准河運民船。非沙船可比。應委員分幫押運。掣取上兌回批。並添派大員赴通照料。仍按船各封樣米三分。加貼印花。帶通呈驗。以憑查覈。○又奏准米船酌帶貨物二成。免其納稅。惟洋藥一項。仍不准私自攜帶。如查有夾帶者。照章捐釐報稅。以示限制。○又奏准兌交斛收。均以漕斛。應將淮安

府鐵斛。攜帶赴通較對。○又奏准。江北漕糧。每石折收銀二兩四錢。全數解司。以一半按部價。每石銀一兩四錢解京。其餘一半。採買杭秬。約計米價需銀二兩有餘。以解部例價外之節存銀一兩。又益以例支漕項行月贈給丁等銀。作為一半河運之費。計尚不敷。再由外籌補。事竣分別報銷。○又奏准。試行河運。事屬創始。買米按照市價開報。水腳按照石數給發。所有插壩。緯輓。席片等項。未能豫計。統俟事竣後。彙同米價報部。○又奏准。船戶水腳及神福犒賞。每石

給銀六錢。為數較多。惟係初次試行。不得不稍寬雇價。暫以六錢給發。嗣後不得援以為例。○又奏准。河運民船。係徑運通州。其剝費雜費兩款。自可毋庸批解。惟經紀箇兒錢一項。前經倉場奏准。每石給銀二分。令解交倉場衙門彙收覈辦。○五年

論東省河道。乃行漕最要關鍵。上屆東省所挑加運兩屬各工。不無多費。而米船仍係繞湖而行。本屆糧艘自應入湖行走。現在江省已遴員分投購米雇船。漸有頭緒。亟宜將運道豫籌濬築。不得畏難推諉。致誤

漕行。○又奏准。河運途長日久。日食較多。兼之盤剝折耗。實有不敷。嗣後船戶食耗等米。每運米一石。給耗米二升。○又奏准。漕船過清江後。沿途水勢深淺不一。遇有淺處。即在途酌雇剝船起運。以利進行。一面分咨各該督撫。轉飭守河營員地方官弁。按站防護。趲運抵通。○又奏准。漕船所帶貨物。應以裝米輕重價值科算。如裝米三百石。帶二成土宜六十石。其貨物價值。不過銀一百二十兩。回空之船。帶成本銀五百兩之貨。均以置貨發票為憑。由糧道飭委查明。按船

開單黏發護照。經過關卡。查明免稅。驗照放行。
○又奏准。河運漕船到東。業經立秋。恐難回空。
即在臨清雇船接運。轉送通州。令南船趕早回
空。免誤受兌。○九年

諭

江北漕船行抵八里廟一帶。節節阻滯。現在水勢消
涸。抽溝剝運。業已無及。擬籌雇民車。改由陸路運至
臨清。再行接運。自應如此變通辦理。即著分飭江安
糧道。運河道等。趕將已到臨清之米一萬餘石。立即
裝載開行。其未到漕米。務當星速催齊。一律轉運。並
籌備船隻。隨到隨裝。不得再有遲延。○又

諭本年江北河運始因出口處天旱河涸裝兌較遲至
行抵清江。輓運尚速。惟入山東境內。因大泛。鄒山兩
口及微山獨山等湖。節節淺阻。而鄆城縣之江船口
隄埝潰決。安山張秋一帶。輓運艱難。加以今年黃水
消落較早。以致守候月餘。並無卸貨逗遛之事。該糧
道於東境河道情形。未能熟悉。漕船阻滯。事出有因。
尚非遷延貽誤。即著免其查議。嗣後江北河運事宜。
該督撫等仍當飭令經手各員。迅速辦理。毋得再有
遲誤。○又奏准雇船裝運。換船接運。神福犒賞等項。
每裝米一石。開支銀七錢。近年銀價日見昂貴。

改支錢八百文。分別酌給。○又奏准。解通輕齋
席木銀兩。廳倉茶果及箇兒錢。仍照章批解倉
場衙門兌收。此外一切陋規雜費。概行禁革。所
有剝價等項。照案毋庸批解。○十年

諭

張秋築隄束水。查勘情形。礙難辦理。現擬將沮河頭
車家樓民埝堵塞。添築攔壩圍隄。並將鄆城屬之七
里鋪民圩隄埝。加築堅厚。添鑲護埝。其八里廟臨河
民埝。及王家垓兩處。分別添築內隄大壩。所籌尚屬
周妥。惟黃流變遷靡常。必須就目前水勢地形。熟籌
審辦。方不至虛糜工費。徒託空言。即著飭令派出各

員實力興辦。總期於漕船未到之先。一律修濬妥協。免致臨事張皇。以重漕務。○又

諭

現在黃水挾汶東下。安山以北。毫無來源。擬導衛水。濟運於臨清。衛河入運。及張秋清黃將接之處。各建一橋。俟漕船將屆渡黃。蓄高衛水。使之南行。並擬於張秋淤高之處。挑深丈餘。增培兩岸。以為運河口門。將安山以南運河。一律挑濬深通。黃水盛漲。即由安山入鹽河。至漁山上。駛以達張秋。可免繞坡渡黃之險。漕運關係京倉要需。亟宜設法迅辦。即著派員前往詳細查勘。妥速辦理。至侯家林決口。現當水涸之

時。及早堵築。尚易為力。仍當趕緊籌辦。務於年前興工。將該處決口迅速堵塞。並將淤墊運道。一律疏濬。俾來歲江北漕糧過境。得以暢行。毋得畏難遷延。致干重咎。○又奏准。漕船未渡黃以前。嶧縣境內之大泛口。為山水經由之所。一遇暴漲。則迅流急湍。水退之後。則沙淤停積。水深不及二尺。河底碎石縱橫。最礙舟行。必須由山東認真挑挖。深四五尺。並將近灘石堆剷除。與河底配平。方利行駛。自大泛口而北。則有滕縣境內之郝山口。為入湖要道。淺而且窄。又有微山湖內之王家樓。

滿家口。安家口。獨山湖內之利建牐。南陽湖以
北之新店牐。華家淺佛牐。南旺牐。分水龍王廟
以北之劉老口。袁口牐。處處淤淺。或數十丈。或
百餘丈。亦須逐段勘明。一律挑深。方可無阻。○
又奏准。黃水穿運之處。漸從而南。自安山至戴
家廟三十里。自戴家廟至八里廟二十二里。運
河舊有之隄。盡被黃水衝破。缺口極多。需用剗
船下旋。以立之根。然後漕船繳關。步步上移。十
里鋪。姜家莊。道人橋等處。又極淤淺。須由山東
設法。一面於淤阻處極力疏濬。一面於運隄各

缺口排釘木椿。貫以巨索。俾漕船經過有所依傍。牽輓不至失事。○又奏准渡黃以後。張秋至臨清二百餘里。河身有高有下。其疏導之法。須量河身高下。一律深通。再於黃流已長未落之時。即下牘板蓄水。以免消耗。或就平水南牘。迤東築一挑水壩。引黃入運。○又奏准漕船經由東境一千數百里。向歸嶧。滕。魚臺。濟甯。東平。東阿。各州縣。封雇船隻。以備起剝之用。而地方官相距甚遠。兼顧不遑。嗣後責成管河廳員。雇備剝船。小者裝米三十石。大者至百石為止。一遇

漕船淺阻。斟酌起剝。由糧道按石給發飯錢。至
插夫亦改由河員招集。一併由糧道給予工食。
○又奏准。東平州運河之西。有一鹽河。倚山為
障。為東省鹽船所經要道。漕船若由安山左近
繞入鹽河。至八里廟。仍歸運道。計程二百餘里。
較之徑渡黃河。難易懸殊。如漕船行抵安山。適
遇黃流迅猛。止宜變通改道。應自安山三里堡
入鹽河之路。豫先勘明何處平順。先立標竿為
誌。○又奏准。漕船經行河道。或遇水小載重。偶
有阻滯。必須先期籌備剝運。所有滕縣。峒縣。魚

臺沛縣四處。責令滕嶧二縣會辦。濟甯東平汶上嘉祥四處。責令濟甯州專辦。八里廟以下。責令東昌府專辦。由司籌撥船價銀兩。先期雇備。候漕船到時。由該府縣帶領同行。遇淺即剝。分定地段。嶧滕送至濟甯。濟甯送至八里廟。其八里廟以下。由東昌府送至臨清。甑板插為止。各專責成。○又奏准。蘇松等各府州屬冬漕米石。前均由河運赴通。自道光初年。及咸豐同治等年。俱係由海運津。惟權宜之策。不如規復舊章。現在試辦河運。已有江北成法可循。所有鎮江

府屬丹陽金壇二縣錢漕仍折收抵徵錢文易銀解司約可採買米二萬石分辦河運責成糧道趕赴天津俟海運事竣即至通州交兌河運米石○又奏准重運經臨泇河同知於曹家水工微山湖蒲料內昭陽湖華家莊迤北止計程八十七里安設水站三撥派令弁兵導行每撥大船一隻每隻水手六名行緯船十八隻每隻水手四名共九十名每名日給飯食銀六分又黃水穿運糧船繞坡行走捕河廳通判於東平汛迤北之三里堡起至水南橋對過入運止安

設十撥。派令弁兵導行。每撥大船一隻。水手六名。行鱗船六隻。每隻水手四名。共三百名。日給飯食銀六分。所需經費。均由該同知等捐辦。毋庸另行籌款。○十一年奏准。民船承運江北漕糧。賠累過甚。於例給耗米二升外。加給二升。○又奏准。東省運河。安山三里堡。乾運河淤河。必須挑挖。二道撥缺口。尤須堵閉。漕船繞過戴廟。插至五空橋。行走至下十里堡。淤河。亟應興挑。姜家莊。乾河淤灘。必須開通。馬家陸家。單薄缺口。亦須堵閉。沈家口。乾運河淤灘。均應挑深。由

積水插繞入西坡。至八里廟入張秋口門。攔黃壩淤河。至高家林缺口。及官隄大小缺口。並須挑堵補築。方可束黃入運。堵挑各工銀二萬九千餘兩。籌款撥發。嚴飭挑濬修築。以利漕行。○又奏准。河運每石酌帶餘米七升。隨正交倉。以備虧折抵補之用。本屆米數較多。經費難籌。僅帶餘米一千石。如有餘存。仍行交倉。虧折不敷。即以上屆存倉餘米作抵。以重正供。○十二年

諭

本年江北漕糧。仍辦河運。東境河道阻塞。所有漕船經由戴家廟馬家口一帶。及張秋至臨清等處淤塞。

地方。又荷澤臨濮菓汎各口民堰衝缺處所。亟應分別疏濬堵合。著將漕船經行河道。趕緊豫籌修理。以利轉運。毋稍延誤。○又奏准。山東省豫籌來年南漕。經行河道。勘估戴廟牐舊運河及十里堡等處淤墊。並隄埝殘缺各工程。亟應挑築。又東阿陽穀聊城堂邑博平清平六縣。量挑長河工段。切實估計。需銀四萬四千餘兩。籌款發給委員。會同地方官切實辦理。○十三年。江北漕糧停辦河運一年。○光緒元年。奏准。江南省江甯淮安揚州徐州通州四府一州起運漕米。仍行河運。

共米十萬五百十三石九升九勺。分派委員雇
齊船隻。照章分作前中後三幫。各州縣將米運
赴寶汜水次。驗兌開行。○三年奏准。本年江北
回空漕船。由衛河行抵臨清。天氣嚴寒。河流枯
絕。不能入運。即在衛河停候。汛漲。任各船戶載
貨謀生。經過地方。暫免徵收船料。至船內貨物
稅釐。仍照常徵抽。俟來春汛漲南旋。即行停止。
○七年奏准。山東省八里廟黃運口門。因上游
水勢南趨。來源微弱。酌在陶城埠地方開挑新
河。漕船由十里堡出。插入黃。順流至陶城埠。徑

達阿城插進口。○十二年奏准江蘇省酌提漕米五萬石。試行河運。一切章程。參仿江北辦理。開支運費。不得過部定每石一兩二錢七分之數。即將海運案內向給沙船水腳暨節省耗米等款。為河運經費之用。如有不敷。由漕項內通融湊抵。以期無誤漕行。○又奏准江蘇省歷辦海運。俱係起運秬米。此次試辦河運。因江陰丹徒等處河水淺涸。瓜洲至揚州一帶。亦難行駛。飭屬在寶應設立水次。採買秬米。紅白兼收。責成河運局員詳加驗兌。不得撓和潮溼。○又奏

准本年蘇屬漕糧四起。江北漕糧十起。需船七百號。有奇。運道綿長。船多水缺。實已大費周章。來年即照案。剝運五萬石。能否足資浮送。尚無把握。惟河運本行漕舊制。現又奉

旨。逐漸擴充。明年蘇省河運。擬增米五萬石。合之本屆試辦之五萬石。共成十萬石。

欽定大清會典事例卷二百十

戶部

海運

分成籌運
食耗等米

封雇船隻
改折糧變

驗收監兌
籌備賠補

分成籌運○道光五年

諭

上年江南高堰漫口。清水宣洩過多。高寶至清江浦一帶。河道節節淺阻。於本年重運漕船大有妨礙。屢經諭令欽差尚書文孚等會同兩江總督及河漕諸臣妥商籌辦。均以清水來源本緩。一時難期暢注。而重運瞬即前進。未便停待。懇請引黃入運。藉其浮送。此固不得已權宜之計。雖添築牯壩。鉗束盛漲。自可

無虞泛溢。第黃水挾沙而行。過後必致淤墊。恐目前
偶資濟運。日久貽患滋深。終非善策。從前海運之說。
悉據臣工條議。有謂可以試行者。亦有謂斷不可行
者。迄無定見。朕思江蘇之蘇松常鎮。浙江之杭嘉湖
等府屬。濱臨大海。商船裝載貨物。駛至北洋。在山東
直隸奉天各口岸。卸運售賣。一歲中乘風開放。每每
往來數次。似海運尚非必不可行。朕意欲將各該府
屬應納漕米。照常徵兌。改雇大號沙船。分起裝運。嚴
飭舵水人等。小心管駕。伊等熟悉水性。定能履險如
夷。所有風濤之警。盜賊之事。亦可無慮。惟事係創始。

辦理不易。然不可畏難。坐視漠不相關。著魏元煜顏
檢張師誠黃鳴傑各就所屬地方情形。廣諮博採。通
盤經畫。悉心計議。毋存成見。務將如何津貼沙船旗
丁不致苦累。雇用船隻有無騷擾閭閻。抑或隨船均
須派委員弁照料護押。及各該屬由何處水次兌運
開行。抵北時灣泊何所。以便起卸運通之處。一一熟
籌。據實具奏。候朕裁酌施行。至江廣幫船。應否同江
浙漕糧一體轉運海口。俟江浙等幫海運著有成效。
再行歸併籌辦。亦著一併議奏。○二十六年

諭。漕糧為天庾正供。支放攸賴。每歲京倉應放俸米甲

米各項共需漕糧三百數十萬石。顆粒不容短少。亦不能暫緩時日。太倉舊時積蓄。因歷年漕糧短額。均已動放無存。覈計各倉現存糧數。僅可放至新漕抵通之時。是明年漕糧必需四百萬石。至少亦須三百七十八萬石。方足以敷支放。近年以來。各省歲運額漕。逐年短少。江南一省。江安蘇松兩糧道所屬。緩缺尤多。似此有減無增。年復一年。伊於胡底。且以京師官兵俸餉。立等發給之款。儻因漕糧缺額。以致發領不能足數。彼時即將該督等加以重懲。亦豈能補救萬一。朕軫念民隱。凡各省奏請蠲緩。無不立沛恩施。

江南地方。近年即有偏災。朕亦不必遽疑為捏報。惟
本年懇請蠲緩者。竟至五十餘州縣之多。或因辦理
漕務。兌費繁重。藉此為體恤地方之計。豈竟置京倉
於不顧耶。因思海運章程。道光六年辦有成案。現當
整頓漕務。清釐幫費之時。著該督撫通盤籌畫。如可
仿照前章。確有把握。即統覈漕糧實數。每歲酌分幾
成。改由海運。於道光二十八年為始。庶漕費可以節
省。而州縣等亦不致藉此捏報災荒。致虧倉貯。○二

十七年

諭。所有道光二十八年蘇州松江太倉二府一州漕白

糧米准其改由海運。三十年奏准江蘇省蘇松常太三府一州應徵白糧正耗米七萬二千石零。援照二十六年成案由海運津。咸豐元年諭所有來年蘇州松江常州鎮江太倉五府州漕白糧米著准其一律改由海運。二年

諭黃宗漢奏籌議新漕懇請試行海運一摺本年浙江漕船開兌過遲最後各幫延至九月下旬甫經輓運出境即使截剝回空斷難如期歸次受兌所有來歲新漕亟應變通辦理以免貽誤著照該撫所請改由海運以期迅速並准將原辦河運各費併歸海運支

銷一切章程。即由該撫督飭司道慎重籌議。妥速奏
辦。○三年覆准。白糧米質柔嫩。最易發熱變色。此次
先撥寬大沙船於第一次全數裝運。各該商船
務將白糧全裝麻袋。堆架船艙。毋得散放在艙
致令氣鬱不宣。蒸潮霉敗。儻有疏率。惟承辦之
員是問。○六年議准。江蘇省應運五年漕糧。已
截留二十萬石。供支兵餉。其實在應運漕白正
耗及支贖給丁餘耗米石。共計七十五萬五千
餘石。令即如數起運。不得短少。其歉緩南漕等
米。並令各該州縣於本年秋成後。按限徵完搭

運○七年奏准京倉開放杭米一項不敷甚鉅
應令江浙二省漕糧提前趕辦明歲及早抵津
並嗣後漕糧不准以撫恤為名率請截留○同
治二年奏准江蘇省新復地方減成酌徵冬漕
統共起運漕白正耗等米十二萬二百餘石隨
給沙船耗米九千八百三十餘石一律由海運
津○十二年咨准輪船協運江浙漕糧自應分
別先後挨次裝運嗣後滬局派給糧米時即將
某日兌收某項糧掣給兌米收單其裝運之次
序即按兌收之先後為準仍於米袋之上籤用

某省漕白糧米字樣竹牌。以示區別。○又咨准江浙兩省派裝輪船糧米。為數既多寡不同。起運亦遲早不一。自應於上棧時。由滬局派員認真監兌。兌竣即由輪船商局製給收米回文。滬局即為巖事。至以後如何裝船如何起運。俱由商局隨時覈辦。滬局不再與聞。庶免牽制。封雇船隻。○道光五年

諭琦善等奏請將蘇松常鎮太四府一州應徵道光五年分漕糧。全由海運。並議定運送兌收各章程一摺。海運事宜。前據琦善於抵任後。飭令藩司賀長齡赴

上海查看情形會同妥議。茲據奏現雇有沙船一千餘隻。三不像船數十隻。計春夏兩次可以運米一百五十餘萬石。著照所請。將蘇松常鎮太四府一州新漕。並緩帶漕糧。由海運抵津。○又覆准封雇民船大小多寡。總期裝運適用。毋得概行封禁。致累商民。○咸豐元年覆准上屆海運漕白各糧。上海沙船不敷運送。閒雇外省蜑船及三不像等船一併裝載。今屆僅運白糧。需船無多。全用上海結實寬大船隻。並照案取具該船戶船行承攬保狀存案備查。○二年

諭來年浙漕海運係屬創始。豫雇船隻最為緊要。除由該省自雇北運商船外。其不敷船隻應由上海添雇。著兩江總督江蘇巡撫派委妥員幫同辦理。○三年議准本屆浙江漕糧海運所需船隻除甯波船三不係船由浙省自行封雇外。其上海之沙船及直隸之衛船山東之登由子船由浙省派員赴滬設立總局會同蘇省委員不分畛域一律封雇以資裝運。○又

諭著直隸山東各督撫速派幹員封備衛船並著奉天府府尹及各督撫確查各處海口如有甯波商船停

泊押令迅速回浙聽候封雇裝運漕糧不准胥役人等需索滋擾致生事端○五年議准江浙兩省運送漕糧應需船隻若干趕緊多雇沙船如甯衛各船未經進口以前浙糧到滬即將所雇沙船隨時移送毋得稍分畛域致有停兌之虞○同治五年

諭浙江本屆新漕米數較增尤須多備船隻俾敷裝運著直隸總督山東巡撫卽飭產船各地方官儘數挑選堅實東衛等船趕緊駛赴上海協運俾免貽誤○又奏准浙江省海運封雇商船於例給水腳之

外。每石酌增銀一錢五分以資津貼。○十一年
奏准嗣後海運白糧抵津由各該糧道自雇民
船剝運赴通。毋庸在津候驗。

驗收監兌。○道光五年

諭海船押運到津。經紀人等難免需索刁難。著軍機大
臣屆期奏請欽派一二員前往驗收監兌。○又

諭海船到津。為日甚速。著兩江總督於初次兌竣沙船
將次開行時。由四百里馳奏到日。即請欽派大員前
往天津查辦。○又覆准沙船進口日期。無論何處奏
報。總以奏報先到之時。即奏請

欽派大員前往天津。庶起卸從容。不致遲誤。○又覆
准由天津轉運通壩之米麥豆石。並北倉截卸
之漕糧。或係地方官兌收。或係坐糧廳督率經
紀兌收。均由地方官派委佐貳等員。帶同兵役。
押送到壩查驗起卸。庶船戶夫役人等有所畏
懼。不致有偷漏攬水等弊。○又議准商船裝運
蘇松常鎮太四府一州屬漕糧一百五十餘萬
石。分作兩次運津。計每次運米七十餘萬石。運
抵天津東門。承辦各員多備剝船。增添人夫斗
斛。由驗米大臣察看情形。督令剋期兌收完竣。

不得遲滯。○又奏准海運漕糧上海為總匯之地。屆驗收兌裝之時。派委道府丞倅四員。先於各州縣剝船到次時。會同蘇松太道。逐一盤驗。必須乾圓潔淨。升合無虧。秉公斛量兌收。○又諭著於兌運時。派委道府大員等逐一盤驗。將米樣貯筭。黏貼印花。交沙船帶津。以備欽派驗米大臣查對。○又

諭江蘇現屆新漕啟徵商船陸續歸次。來年二三月間。即可次第兌運開行。著責成蘇松督糧道會同蘇松太道。查驗米色。兌交商船。並封貯樣米。隨船帶赴天

津。由交米委員送交欽派大臣比對米色。按冊交收。其到津以後過剝事宜。責成坐糧廳帶同經紀人等。一手經理。押運赴通。所有江省交米委員在津。將漕糧兌給剝船。即已交卸竣事。毋庸再至通倉。以免推諉。○又奏稱。每船於正米內提出樣米一斗。裝儲木箱。黏貼印花。即交沙船帶津。所派道府於驗米後。各帶佐雜一員。由陸路趕赴天津。俟沙船一到。將原封米樣稟請驗米大臣。在於沙船比驗。一經交兌剝船。即與沙船無涉。○又覆准海船運米到津。起剝後。即與沙船無涉。惟既經查驗。

如係徽變應由海船賠補外。如僅靠幫挨底。或受蒸潮。尚不至於徽敗之米。難以一概挑換。即記明數目。分別挑晾。收儲入倉。或先行搭放。亦可。此項潮潤未經徽變之米。不可與乾潔好米夾雜混淆。應於海船起卸時。由在津驗米各員將起剝米石。分別乾潔潮潤數目。另行書立冊檔二分。以一分存於驗米各員之手。以一分移送在壩收米之坐糧廳。並將裝運剝船編立字號。由驗米委員。給予該船米色數目。船戶姓名印票。轉令該船將所裝米石。按照印票米色數

目自行書寫旗號籤識以便沿途查催押運各員一目了然到壩時由坐糧廳查檔對票以憑收受其乾潔米石如受潮潤及潮潤米石如再徵變或另有偷漏攙和等弊以致米色米數不符嚴究懲治並令經紀船戶分賠○又奏准制運到壩由駐通之倉場侍郎督同坐糧廳大通橋監督會同大通橋抽查御史親詣查照存記米樣比對如米色不符及查有攙和偷漏積壓等弊立將押運之經紀拏送刑部嚴懲著賠並將督辦沿途稽查不力之文武員弁一體查叅

○六年

諭海運沙船已陸續開出十漵地方候過二月初八日
風信即可開行著派穆彰阿於海運沙船進口後前
赴天津會同倉場侍郎驗收隨帶司員即自行酌派
隨往○又奏准每船另裝樣米一筭蓋貼印花帶赴
天津照驗兌竣一船即將司道會印三聯執照
截給一張所有船戶者舵姓名以及縣分米數
詳細註明以憑稽覈至領給水腳之後即令船
戶給州縣米結一紙委員亦給兌單一紙存照
○二十八年奏准各船樣米原備收兌時考較

之資。惟木筒裝盛米色易至受罨轉不足為查。驗比對之據。應仿照白糧辦法。以麻袋裝儲。黏貼印花。交沙船自行攜帶。俟到津日。由江蘇委員呈送驗米大臣查對。又

諭米石潮溼。用藥使水。其弊不可勝言。前經倉場侍郎查出潮溼米船業。將該船戶代役等分起。咨送刑部。著該部即嚴行審究。加等治罪。此後如再有潮溼米石之船。並著即行送部。一律懲辦。○咸豐元年。覆准上屆海運一百九萬餘石。係在省城及上海兩處分設總局。今屆海運白糧七萬餘石。不及上

屆十分之一。毋庸設立省局。其上海雇船交兌等事。照案設局委辦。以專責成。○二年奏准。本年浙江省杭嘉湖等府所屬有漕州縣。均被災歉。其成熟田地。因禾苗缺雨。米質未能純潔。所有熟田漕米。俱令紅白兼收。私杭並納。○又奏准。明年海運。應由駐通倉場於五日奏報摺內。聲明每日起運米。均符三萬石之數。並轉飭駐通坐糧廳。將每日起米若干石。卸船若干隻。按日開報驗米大臣。以便查催。而免積壓。○又

諭定例。漕糧抵通。坐糧廳驗收起卸。每日應起米三萬

石本年海運剝船通壩驗收。每日僅一萬餘石。或二萬餘石。以致剝船停泊待驗。積壓至二十餘里之遙。該坐糧廳並未遵照例限。如數斛收。致令航海沙船。不得及早回空。辦理殊未妥協。著交部議處。仍著倉場侍郎嚴飭該廳員等。隨到隨驗。以速補運。儻仍復遷延。或縱容經紀人等。故意刁難。為需索地步。即著據實嚴參。其大通橋各官。亦飭一體遵照。迅速轉運。毋任再有稽延。○又奏准。嗣後令駐津坐糧廳將所取經紀各甘結。按日申報驗米大臣。以憑查覈。並令駐通坐糧廳臨時切實查究。如有偷漏攬

和等弊係由經紀拏獲則責令剝船獨賠治剝船以應得之罪若經紀並未查出稟究或通同作弊分肥則責令經紀剝船分賠並各治以應得之罪此後由壩運橋由橋交倉如有短少潮溼均惟經紀車戶是問不得牽涉外河剝船更不得牽涉原裝沙船入倉以後如有灰黯黴變則責令該倉賠補治花戶以應得之罪不得牽涉經紀更不得牽涉剝船應由駐通倉場於五日奏報摺內將米色米數切實聲明以免日後牽混○四年奏准海運米石自剝船起運以後

乘聞使水應令駐通倉場侍郎於剝船抵通時
嚴飭坐糧廳認真查驗遇有潮溼米石該侍郎
刻即親赴剝船驗係實有使水情弊訊明經紀
拏獲者酌量情形輕重分別奏咨即將剝船送
交刑部照例加等治罪如係經紀故縱使水通
同舞弊即將經紀一併送交刑部並令大通橋
御史照例抽查一有潮溼米石即行駁回仍將
經紀送交刑部均照例加等治罪毋稍寬縱○
六年議准江蘇省海運向於省城上海天津三
處設局各委司道守丞等員分任其事而以縣

佐襄理一切。惟漕白糧米均須乾圓潔淨。應令
司事各員認真查驗。不得稍有攙雜。以昭慎重。
○九年議准江蘇省漕運向係杭米。今屆節候
尚早。秬米漸熟。杭米尚未登場。應仿照浙江成
案。秬稅並納。惟米色米質必須認真挑選。毋許
濫收濫交。並嚴防攙雜糠秕等弊。仍令將實在
起運秬米若干。秬米若干。先行咨部。並飛咨天
津驗米大臣。以憑稽覈。○又議准向來沙船到
津。隨驗隨起。按數給照。不令稽留。此時已屆深
秋。商人趕運到津。尤宜迅速兌收。如江蘇委員

尚未抵津。頭批米船業已進口。即由天津驗米大臣督飭司事各員先行驗收。俾得及早回滬。憑照領價。○十一年議准。今屆蘇省起運米數無多。非往屆正運可比。應援照歷年正漕完竣後。續到漕白米石。由天津道驗收。運通成案辦理。毋庸奏請。

欽派驗米大臣。其天津驗收事宜。責成天津道認真經理。通州驗收事宜。由倉場侍郎照章辦理。○

同治九年

諭。明春江浙海運漕船抵津。著戶部先期奏派倉場侍

郎一員。早日赴津。會同直隸總督妥籌辦理。其通州
驗收轉運事宜。即由留通倉場侍郎一手經理。毋庸
另請派員以專責成。○十二年奏准。嗣後海運江浙
漕糧。改由該糧道自行運通。交納毋庸在津驗
收。○又咨准。漕糧派裝輪船。應由滄局先期酌
派縣分。俟各縣運米到後。即填單知照輪船商
局。酌派執事。至南馬頭。會同詳驗。如米色一律
乾潔。方准收兌。再由輪船局押赴浦江東棧。斛
收。儻米涉潮雜。即由海運局監兌委員。押令分
別風晾更換。○又咨准。輪船裝運之米抵津。即

飭知津局各員董於二月十五日以前提前驗收以免壅滯。○又咨准沙甯等船承運糧米向由滬局填給三聯印單以備抵津後憑單交米。此次輪船裝運之米以三千石作為一船即填給聯單一紙由津局稽覈惟沙甯等船向有領銀領米各結而輪船即以收到銀米回文為憑毋庸再行具結庶為簡便。○又咨准輪船裝運漕米俱用麻袋以便易於起卸抵津驗收米石後仍將麻袋交輪船帶回以備下次裝盛之用。食耗等米。○道光五年

諭酌給沙船耗米一款著即於例給旗丁耗米十八萬
餘石內動放所有節省耗米六萬餘石並令隨同起
運正耗米石一體運送抵津○又奏准沙船食用折
耗每白糧一石給耗米一斗糙米一石給耗米
八升又

諭剝船自津赴通盤量不無折耗有例應給丁耗米十
八萬餘石業經奏准撥給商船十二萬餘石尚有節
省耗米六萬餘石除此項搭運節省耗米內應劃給
商船外實存米五萬九千六百餘石隨正起運赴津
所有天津剝船盤耗飯米等項即於此項節省耗米

內酌量撥給。著倉場侍郎會同直隸總督妥議辦理。
○又覆准。明年海運到津起卸。議將漕糧折耗。於每石一升外。添給五合。至白糧米質鮮嫩。折耗較重。應每石給耗米一升八合。○六年奏准。官剝船戶食米。按其水程。每百石給予本色食米一石一斗五升。○咸豐元年。覆准貼給沙船耗米。係豫備交卸折耗。抵補正米之用。應由各屬自行購備白米。隨正兌交。至節省給丁餘耗。盤耗等米。係撥補災缺兵恤等糧。毋庸春辦。即將此項米石。與節省春耗米及運船水手飯米。

概以糙米存儲候撥。所有前項各款米石細數。除於交兌正糧時。開造實存冊結專案報部外。仍令於白糧奏銷案內。逐款分析題報。○又覆准。沙船耗米。原備交兌折耗之用。儻有贏餘。俟於抵津交足正項後。再行變賣。如有在本地售賣者。即將賣戶買戶。均行責懲。如州縣折給錢文。立予叅辦。○二年覆准。剝船食米。係給船戶飯食之用。每漕米一石。給食米一升一合五勺。每石折給銀一兩四錢。通倉經紀耗米。係備赴通折耗之需。每漕糧一石。給耗米一升五合。白

糧一石給耗米一升八合。均以洪斛合計。此二項本係米款。准其備帶本色。以免周折。計本年海運漕白二糧一百四萬六千二百餘石。共需食耗等米二萬七千九百餘石。隨正兌交沙船。一律運津。按交倉米數。分別兌交給發。○三年議准。向來江省海運沙船。貼耗經紀暨貼耗剝船食米。均於旗丁應得耗米內劃給。此次浙省海運所有前項耗食等米。亦在旗丁耗米內開支。覈計本年漕糧給丁耗米。共七萬九千三百四十九石三斗一升九合三勺。內除給商船貼

耗四萬六千一百十八石八斗七升六合四勺。
經紀貼耗八千六百二十三石八斗六升八勺。
天津剝船食米六千五百三十九石七斗七升
八合七勺外計賸漕白耗米一萬八千六十六
石八斗三合四勺內白糧賸耗應將春耗歸糙
該申米二千四百五十四石七升一合四勺共
賸耗米二萬五百二十石八斗七升四合八勺。
令一併由海運津毋庸糶變以重倉儲而供支
放○四年奏准現在採買米石由天津道雇人
斛收經紀既不承運毋庸撥給耗米應同新增

剝船食米一併作正交倉。○又咨准江蘇省金山等縣截漕等米。雖係正供。然並無經紀在津斛收。與採買事同一律。所有各船備帶經耗米石。令一併作正交倉。仍將正米若干。耗米若干。分析報部備查。○五年議准沙船食米一項。抵津之後。除有虧短徵變。飭令賠補外。如有贏餘。應由驗米大臣給價收買。務使沙船得需餘潤。概不假手胥吏。致有剋扣。該省於米船裝兌之時。務飭委員認真查驗。毋許折價。並嚴禁水手人等沿途售買。○九年議准所有本年餘賸耗

米一萬九千二十七石零。即令留撥兵米造冊報銷。○又議准江蘇省每年起運白糧七萬二千餘石。現飭該商董於採買數內慎選好米照額春辦白糧。全數附運例支春耗。即令合作糙米統算。○同治七年奏准在南省來年漕項內籌添剝船耗米。無論正漕籌備。每百石照經紀耗數酌減。即按食米之數。給予一石一斗五升。隨船配帶。並仍照經紀之耗米。隨正交倉。設有短欠。仍照定章賠補。先在船戶名下比追。如實在無力賠補。再由該道查明短欠數目。詳明倉

場即將交倉之耗米劃抵彌補其贏餘之米仍
行儲倉。○八年議准商船應得耗米務令全給
本色。行抵津次後嚴禁該船私糶分剝仍照案
由津局按照市價收買三成不准短缺。○又奏
准此項剝船耗米按照戶部添撥耗米之數購
辦一半。每百石籌備添撥賸耗米五斗七升五
合。按正漕備帶米數籌款購足隨正抵津交納。
○十二年咨准向來沙甯各船承運漕糧每石
給耗米八升。白糧每石給耗米一斗。飭令運津
以補正米之不足。仍將漕糧商耗覈出二成。白

糧數出三成。由津局給價收買。隨正交通。此次輪船裝運之米。仿照一律辦理。如正米或有虧短。即由輪船商局照數賠補。

改折糶變。○道光六年

諭江蘇省各年緩帶米石。前經該督等請隨同新漕一併搭運。惟該省本年起運全漕。米數甚多。民間蓋藏未裕。現值青黃不接之際。自應量加調劑。以恤民艱。著加恩將該省海運應行搭解緩漕米石。即飭藩司按照時價出糶。俾民食有資。所糶銀兩。剋期提解。司庫報撥。儻倉米未能一律。糶不足數。即責成收儲之。

員。照價賠補。○又奏准。蘇屬徵存積年緩帶漕米。已留本省糶濟民食。所有此項贈五等米九萬八千七百餘石。本係節省所餘。並非正米。應一併留省。按照時價。每石銀二兩二錢五分。出糶提銀解歸道庫。另行報撥。○咸豐三年。奏准。江蘇省漕白糧米。由海運津。已驗收八十萬五千四百餘石。其未到漕米一萬八千四百餘石。照京倉折放米石。杭米每石一兩四錢之數。飭糧道折價交納。派員解部。○又議准。浙江省本屆海運。餘賸耗米。前令一併由海運津。毋庸糶變。原

為籌備倉儲起見。今據該撫奏稱。浙省自上年
災歉以後。民食不敷。請將前項餘贖耗米。照每
石價銀一兩。由浙糶變。報部候撥。自係實在情
形。所有該省餘贖耗米二萬五百二十石零。仍
照前奏。每石價銀一兩糶變。即將價銀趕緊報
部。○四年議准。現據兩江總督等議。將交倉白
糧正耗米五萬五千三百二十五石五斗九升。
與漕糧一律折徵。仍採買足數。由海運津。應如
所奏辦理。務須慎選乾潔好米。兌交沙船。限三
月內全數抵津。所請將盤春二耗及給丁餘耗

等米三萬二千九百六十二石一斗七升九合
二勺。照河運作正開銷之處。查與河運定例相
符。其應行節省漕項銀兩。及隨漕費錢。並調劑
旗丁各項。均即歸入改折案內彙辦。分析報部
查覈。○六年議准。江蘇省兵恤等米。均係計口
授食。礙難短少。所有短缺米七萬餘石。應照成
案。按每米一石。作銀一兩。改折本色。即以漕費
儘數抵支。並於節省給丁餘耗等米內。照數撥
足。糶變折給。○七年覆准。江蘇省節省給丁餘
耗。同贈五盤春二耗等米。除支銷外。為數有限。

即抵補被災被兵案內缺額兵糧。並飭屬糶變為籌補災缺南糧之用。免其隨正起運。○同治二年奏准江蘇省松太等屬減價折徵。每石收足制錢六千四百五十文。一切公費均在其內。由官買米。由海運津。○四年議准浙江省白糧向係照額起運。今歲田禾被淹受傷。經該撫奏明將白糧一項。剔荒徵熟。蠲緩之數。以漕糧抵額辦運。應令其就數起運。此後不得援以為例。○五年奏准江蘇省收漕折價。議定完本色者。每石加收餘耗。以三斗為率。折色者。年內每石

以四千五百文為率。年外以五千文為率。如遇銀米昂貴。不得不與時變通者。於應徵時奏明辦理。本年蘇松各屬收成中稔。米價較上年稍為平減。所有折色米價及本色應加餘耗。即照市價酌量變通。今屆冬漕完折色者。每石制錢三千二百文。加公費錢一千文。計較上年減收錢三百文。其完本色者。裁去應餘耗三斗。亦改交公費錢一千文。如遲至年外。仍無分本。拆加收錢五百文。以為辦公之用。○八年議准。隨徵節省。給丁餘耗。及贈五盤春運食等米。除開支。

白糧春辦米石及漕白項下隨運沙剝經紀耗食並籌備二升餘米外所贖無幾即照章糶變撥抵沙船水腳及神福犒賞等項之用至糶變米價向係每石提銀二兩同治六年奏明提銀一兩九錢七年奏明提銀一兩八錢本屆與七年市價不甚懸殊仍提糶價銀一兩八錢飭屬就近全數糶變以抵運腳等項

籌備賠補○道光五年

諭海運漕糧無故短少徵變如有斫桅鬆艙傷斃人口情事自應奏明免其賠繳並照例優卹如無故短少

徵變。即令於備帶耗米內補足。如再不敷。勒令買補。
○又覆准。剝船受兌後。向立承攬甘結。開明米
數若干。並無潮溼短少。到壩後。如數交收。並將
船戶腳價飯米折色。並津貼等銀。共計應得若
干。先於受兌後。發給七成。其餘三成。包封彙交
押運員弁領帶。俟到壩後。查驗並無偷漏短少
及攙水潮溼等弊。再行發給。如有短少潮溼。即
將包封三成銀兩。扣抵賠補米石及挑晾之費。
仍按律懲處。再各縣剝船。每十隻有船頭一名。
每百隻有總船頭一名。船戶作弊。均由船頭主

使勾串。如各船有前項情弊。其三成銀兩扣抵之外。再有不敷。即責令船頭賠補。仍飭押運員弁。沿途稽查。如有前項情弊。詳明究辦。儻毫無覺察。致船戶作弊。一併叅處。如該員弁等。因有酌留腳價在手。任意扣抵。及給發時有絲毫剋扣情弊。查明嚴辦。○二十八年

諭李星沅等奏海運未到船隻請先行收買餘米交兌等語。海運沙船進口八百餘隻。其未到各船。當亦接踵而至。惟現在南糧將次到津。自未便因守候海運尾數。致令剝船擁擠。所有海運未到米石。該督等擬

令查明籌買補額交兌。著委員等照數辦齊。顆粒無虧。即責成朱鳳標德誠如數驗收奏報。○又

諭。剝船虧短米石。請旨查辦。當交朱鳳標德誠確切查覈。茲據該侍郎等奏請分別賠補。並另片奏籌防弊端各等語。該剝船虧短米石。雖訊無經紀串通情事。究屬承運不慎。著即查照成案。責令經紀剝船分別賠補。其經紀應賠之米。即於耗米內扣除。再將餘米留抵掣欠。至剝船應賠之米。著責成海運總局清河天津兩道。即行追繳。總於沙船卸米未經竣事以前。一律搭運。不准稍有遲延短缺。所有各船戶虧短至

六石及六石以上者。除按數追賠外。仍行枷示河干。以示懲儆。惟剝船由津運通數日之中。輒敢虧短米石多寡不等。其積弊已可概見。儻不嚴行防範。則乾潔必藉口於收縮足數。又不免使水攙和弊端迭為乘除。實屬可惡。嗣後著駐通倉場侍郎。於剝船起卸米石如稍有折耗。即照前案責令經紀剝船各半分賠。若每船短至四石及四石以上。並查有潮溼攙雜等弊。即將短絀潮溼米石最多之船戶。先行送交刑部。嚴究懲辦。一面咨行天津。迅速賠補。○咸豐二年覆准運米船隻。如在洋遭風除斫桅鬆艙驗明

糧貨俱損。仍奏明豁免外。如貨物並未拋棄。獨
棄官糧者。雖鬆船屬實。短少米石。仍令賠補。
三年

諭。此次江蘇省海運漕糧。除起運正耗米石外。尚有應
行剝運米二十餘萬石。節省銀三十餘萬兩。借領司
庫銀十五萬兩。該省實徵確數。業經奏報在先。截漕
米石。亦係留作軍食。何以遲延至今。諉稱民欠。所有
此項銀米。著怡良許乃釗查明經手各員及辦漕各
州縣實欠數目。按成分賠。即照部定限期。嚴催交納。
如再延宕。即著該部嚴參懲辦。○四年議准。江蘇省

各屬未完漕米二十餘萬石。節省銀三十餘萬兩。借領司庫銀十五萬兩。前經奏請責成。該督撫等查明各州縣實欠數目。按成分賠。勒限嚴催。米則一律運倉。銀則報部候撥。現經該督等查明實數。除震澤等縣已運米一萬一千餘石。長洲等縣已將節省糶變米價及借領水腳銀七萬餘兩。湊解軍餉。並歸還司庫外。尚有陽湖等縣已報未解銀二千九百兩。華亭等縣徵解不符銀三萬五千六百餘兩。勒限一月。埽數解清。如逾限不完。即行奏請革職監追。查抄備抵。

此外各屬欠解銀米實欠在民例得帶徵並非無著之款亦不在應蠲應緩之例概自咸豐四年新漕為始分作兩年帶徵嗣後再有拖欠稽延即將各州縣從嚴叅辦○又奏准歷屆海運到津短缺米石俱由津局委員於給商耗米內買補足額上倉乃該商船耗米往往沿途食用到津總不足額上年浙省商耗已無可買當向蘇省商耗買補今屆蘇省漕糧稀少恐浙省有需買米現飭局員籌備正米五千石給商耗米四百石另雇衛船一隻承運其餘分交原運漕

糧各船加裝帶運各填給三聯單一紙註明米數令其一律開行赴津交兌以備抵補缺米之需如海道順風穩速米數毫無缺少或抵補缺少之外尚有贏餘即一併交倉以實儲備○又議准船戶裝運金山縣續運截漕在洋遭風並未折桅傷人應令全數賠繳以每石一兩六錢迅速勒限繳足買米運通交納○五年奏准官剝船戶並無身家遇有賠補之處恐致稽延現將當堂所給剝價等銀每船十四兩餘內酌留四兩黏貼印花封交委員帶通呈由駐通驗米

大臣倉場侍郎查無弊端即行當面找給儻有
偷漏使水等情即將該船戶及承管十船之船
頭應找之銀一併扣抵以為賠補米石之用仍
將船戶經紀代役照例加等治罪○八年議准
此次起運米數較之上屆已屬加多所有緩缺
之米若再令籌補足額未免民力拮据應毋庸
另議籌補○九年奏准海運米內籌備一項係
該省自行添辦以為彌補商船失風缺斛之用
如有贏餘向由該省自行變價歸款或酌量存
倉留抵來年短缺本年浙江冊報有籌備米一

萬石飭令先行抵正運通。俟續到商船再行撥歸原款存倉。至各商船應有餘米除抵正運通外。江蘇尚餘糯米七十石六斗八升四合五勺。浙江尚餘糯米一百三十四石。此項餘米應歸入籌備項下存倉留抵。各該省缺斛即由戶部倉場另檔存記。以為來年抵補之用。○同治六年奏准江蘇省商船五號共計拋棄糧米六千六百九十餘石。均應於蘇省本屆籌備餘米項下如數補足。不准顆粒短少。其另船受溼漕米俟抵津後由驗米大臣認真驗收。儻米質受傷。

不堪儲備亦即於該省餘米項下一律撥補足數如餘米不敷撥補即責成該省委員買補足額○又議准江蘇省沈元茂商船領運吳江縣米石有水手沿途盜賣捏報遭風之事該船戶等承運官糧於優加水腳後仍敢肆意偷竊應由該督撫飭屬認真研訊按律奏明懲辦至辦運各員以啓不畏法之船戶率行雇覓保領牙行率行出結實屬不成事體應即查取職名從嚴叅處○七年奏准浙江省補運上年採買賑米同時抵津此項米石應歸天津道驗收運通

惟值正漕喫緊之時。剝船不敷分派。因一併飭令抵正兌收。統俟正供交足之後。將後到之米分別撥還歸款。○又奏准。籌備抵正米石。其應解隨漕銀兩。照海運正漕之例。一律批解。○八年議准。所有加給經紀津貼銀兩。仿照從前扣留剝價由通給發之例。由天津道將每起津貼經紀銀六十兩零。按起包封黏貼印花。發交駐壩委員收存。每起米石驗畢。如果乾潔無虧。即由駐壩委員呈交通州驗米大臣倉場侍郎當堂發給。如米色不佳。米數短少。即由驗米大臣

等酌量扣留備抵。○十二年咨准各口貿易向
由洋行保險。此次商局置備輪船堅固精良。毋
庸保險。途中如有鬆船等事。即援照沙甯各船
章程辦理。